

富錦縣史錄

富錦史錄

弁言

雲桐學識謏陋業儒未成因迫於生計艱窘遂漫遊南北忽文忽武時作時輟半世潦倒鮮遇知音民八由滇旋燕九年春首再之龍沙投孫督轅下遇丁屆辰先生任中東路護路軍哈滿司令委雲桐爲少校參謀荷鋤再耕復營寄生事業蒙丁公青眼始終竟事民十孫督轉任吉林丁任參謀長調雲桐爲中校參謀濫竽戎機兩經寒暑十二年春出任富錦接事伊始萑苻滿地民不聊生百計圖維日無暇晷匪氛粗平閭閻安堵斯時於公餘之暇同科長曹佑民先生搜羅考據擬著縣志旋因調任賓縣志未能竟查雲桐在任僅閱四月念八日爲期甚短茲

謹將考據該縣歷史所得簡略纂成名爲史錄以備觀者指正
云

宋雲桐自識

富錦縣史錄

知事宋雲桐
科長曹霈恩
編纂

虞舜時代爲息慎氏東北之一部周曰肅慎亦曰稷慎

(史記五常本紀)至於荒服北山戎發息慎咸戴舜帝之功

(山海經海外西經)肅慎氏之國在白民北

(大荒北經)大荒之中有山名曰不咸有肅慎氏之國

(尚書序)成王既伐東夷肅慎氏來賀

(逸周書王會解)正北方稷慎大塵

(左傳昭九年)肅慎燕亳吾北土也

按息慎稷慎肅慎郝氏懿行謂爲聲轉字通實一國也其名則自虞帝時已見中國下訖兩漢都無異稱綿歷二千餘年傳世可謂最久後漢書挹婁傳乃有古肅慎氏之稱郭璞註山海經直云今呼之爲挹婁國似其易號特在兩漢之間然其後晉元中興猶詣江左貢其石罽成帝時又嘗通

使石季龍宋孝武大明三年復獻其楛矢豈挹婁新國猶沿肅慎舊稱耶抑遺黎保聚自立一方如遼已滅渤海而後唐時猶有渤海入貢之類歟書缺有間未易定也其疆域則郭璞云去遼東三千餘里漢晉千里大抵今之六百餘里晉遼東爲今遼陽以道里考之正當在寧古塔（寧安縣）杜預云在元菟（伊通縣）北三千里元菟去遼東千里其北三千里則當在三姓（依蘭縣）韋昭云去夫餘千里與今長春至寧古塔道里亦復相符夫遼東元菟秦漢始有此稱而周景王曰肅慎燕亳吾之北土則是遼東以北直至混同江南北之地在周以前皆爲肅慎國境疆域至爲廣博滿洲源流考謂其國南包長白北抵弱水東極大海廣袤數千里富克錦（富錦縣）同爲海內之地雖洪荒未辟當亦肅慎國之一部也

漢晉時代爲挹婁國之一部

（後漢書東夷傳）挹婁古肅慎之國也在夫餘東北千餘里東濱大海南與北

沃沮接不知其北所極

(晉書東夷傳)肅慎氏一名挹婁在不咸山北去夫餘可六十日行東濱大海西接寇漢汗北極弱水其土界廣袤數千里居深山窮谷其路險阻車馬不通

按挹婁史載古肅慎國在不咸山北不咸山即今長白山也以地望診之其國都當在寧古塔既言東濱大海則寧古塔東北海以內之地均當爲其國土南北沃沮史言在單單大嶺以東單單大嶺亦今之長白山也曹廷杰三省圖說謂南沃沮在長白山南北沃沮在長白山北則即漢書魏志所云四至言之也較爲近是然則南沃沮固應在高麗咸鏡道北沃沮則爲琿春一帶無疑矣惟魏母邱儉攻高句驪王宮官奔北沃沮儉追之過沃沮千里到肅慎氏南界亦與史載挹婁國南與北沃沮接符合高句驪爲今磨磐山(磐石縣)境又考遼人設挹婁縣於瀋州北纂遼史者復

不諳方位遽以瀋州（瀋陽縣）爲挹婁故地於是不得不以海岳等處（海城熊岳）爲沃沮所謂差之毫厘謬以千里又考晉書不爲沃沮高句驪立傳故其疆域靡得而詳慕容暉載記略言慕容恪攻克高句驪南蘇事是其北境之可見者也惟挹婁一國所記與漢魏略同然云去夫餘可六十日行夫餘爲今長春境南接元菟（伊通境）以邊爲界奉天之懷德開原昌圖一帶均其國境史言夫餘西境即遼東塞外昌圖即前之遼東塞外也又稱爲南夫餘其由長春東北行六十日以道里計之又非寧古塔三姓所能盡蓋已舉東海以內之地兼而有之挹婁疆域之盛始見於此唐書以後乃更加詳耳富錦當未悉其何名要亦爲其領土矣

北魏以後爲勿吉豆莫婁之一部

（魏書勿吉傳）勿吉國在高句驪北舊肅慎國也去洛五千里自和龍北二百餘里有善玉山北行十三日至祁黎山又北行七日至洛瓌水水廣里餘又

北行十五日至太魯水又北行十八日至其國國有大水濶三里餘名速末水國南有徒太山魏言太白在其旁有大莫盧國覆鍾國莫多回國庫婁國素和國具弗伏國匹黎爾國拔大何國郁羽陵國庫伏真國魯婁國羽真侯國

（北史勿吉傳）勿吉國在高句驪北一曰靺鞨去洛陽五千里其部類有七種曰粟末部伯咄部安車骨部拂涅部號室部黑水部白山部

（隋書靺鞨傳）靺鞨在高麗北凡七種一曰粟末部與高麗相接二曰伯咄部在粟末之北三曰安車骨部在伯咄東北四曰拂涅部在伯咄東五曰號室部在拂涅東六曰黑水部在安車骨西北七曰白山部粟末東南

（新唐書北狄傳）黑水靺鞨居肅慎地亦曰挹婁元魏曰勿吉東瀕海西屬突厥南高麗北室韋離爲數十部各自治其著者曰粟末部居最南抵太白山亦曰徒太山與高麗接依粟末水以居水源出於山西北注它漏河稍東

北曰伯咄部又次曰安居骨部再東曰拂涅部居骨西北曰黑水部粟末之東曰白山部其間遠者三四百里近者二百里白山本臣高麗王師取平壤其衆多入唐伯咄安車骨皆奔散寢微無聞焉遣人進入渤海惟黑水完全分十六落以南北稱蓋其居最北方者也

（魏書豆莫婁傳）豆莫婁國在勿吉國北千里去洛六千里舊北夫餘也在室韋之東東至於海方二千里

（新唐書北狄傳）達末婁自言北夫餘之裔高麗滅其國遣人渡那河因居之或云他漏河東北流入黑水

按勿吉在高句驪北高句驪爲今磨磐山地（磐石縣）北接元菟其南境直抵鴨綠江與朝鮮隔江爲界奉天之通化海龍皆其國土後竟吞併夫餘東渡海至新羅北渡遼水至營州南渡海至百濟北至靺鞨東西三百里南北二千里疆域可謂大矣自母邱儉攻破後仍復其國即稱爲

高麗和龍爲今熱河朝陽溝（朝陽縣）太魯水爲今洮兒河（洮南縣）唐書之它漏河遼金之他魯達魯聖宗皆是水也自西北來經扎賴特南界匯爲納蘭薩蘭池亦名日月池會嫩江入於松花江卽粟末水洛瓊當卽老哈之轉音以南有徒太山一語斷之自當以長白山爲界以自太魯水東北行十八日到其國斷之則洮兒河合嫩江入松花江之處渡江東北行約千餘里當在三姓富克錦（富錦縣）之間以國有大水名速末斷之則松花江以東際海之地混同江以南抵長白山皆其國土也七部之分以北史考之應在魏獻文帝延興以前証以松花江舊名速末水則吉林烏拉一帶爲粟末舊部無疑粟末之北曰伯咄卽今之伯都訥（扶餘縣）與金史之部渚渌皆伯咄之音轉唐書作汨咄轉寫之誤也安車骨卽按出虎也地在伯咄之東北應爲今賓州（賓縣）一帶拂涅爲今寧古塔地其西南八十里古城俗呼東京城亦曰佛訥和城卽明佛訥和衛地與拂涅音

近又在伯咄東知爲寧古塔無疑其北無別部則固兼有三姓一帶矣號室部在拂涅東則寧古塔以東三姓富錦以南皆應屬之白山部在粟末東南則清初長白山二部及今敦化琿春皆其地也黑水部應爲今黑龍江然安車骨西北僅就其西境言之其實黑水分部以南北爲柵則三姓以東混同江南北之地皆其部之所在豆莫婁達末婁字異音同實爲一國室韋純係黑龍江地考輿圖黑龍境東不至海則江省以東際海之地如俄羅斯之阿穆爾省等處均爲豆莫婁領土矣第是時那河已爲室韋之地不得又爲豆莫婁所居新書殆就那河入江之後言之而仍被以本名歟何秋濤謂魏收書於邊外山川形勢較各史爲明晰則魏書所記固可依據矣

隋至唐開元以前爲靺鞨及高麗北境開元以後爲黑水靺鞨

（隋書靺鞨傳）靺鞨在高麗之北邑落各有酋長不相總一凡有七種

已見北史卽

古之肅慎氏也所居多依山水東夷中強國有徒太山者俗甚敬畏其國西北與契丹相接與隋懸隔惟粟末白山爲近

（舊唐書北狄傳）靺鞨蓋肅慎氏之地後魏謂之勿吉在京師東北六千餘里東至於海西接突厥南界高麗北鄰室韋其國凡數十部各有酋長或附於高麗或臣於突厥而黑水靺鞨最處北方尤稱勁健每恃其勇爲鄰國之患（括地志）靺鞨國古肅慎也在京東北萬里已下東及北各抵大海其國南有白山

（又）靺鞨國古肅慎也亦曰挹婁在京東北八千四百里南去夫餘千五百里東及北各抵大海

（舊唐書北狄傳）白山部素附於高麗因收平壤之後部衆多入中國汧咄安居骨室韋等部亦因高麗破後奔散無聞焉縱有遺人併入渤海編戶惟黑水靺鞨部全盛分爲十六部又以南北爲柵

(新唐書北狄傳)室建河東合那河忽漢河又東貫黑水靺鞨故靺鞨跨水有南北部

(又)黑水靺鞨居肅慎地亦曰挹婁元魏時曰勿吉在京師東北六千里分爲數十部酋各自治部間遠者三四百里近者二百里

(新唐書地理志)渤海王城北經德里鎮至南黑水靺鞨千里

(唐會要)黑水界南與渤海國德里府接北至小海東至大海西至室韋南北約二千里東西約一千里渤海寢強黑水亦爲其所屬

(舊唐書北狄傳)其地南距渤海北東際於海西接室韋南北袤二千里東西千里黑水靺鞨最處北方尤稱勁健父子相承世爲君長

(文獻通考)武德五年渠長阿固郎始來太宗貞觀二年乃臣服所獻有常以其地爲燕州

(唐會要)貞觀十四年以黑水地爲黑水州

（新唐書北狄傳）開元十一年其酋倪屬利稽來朝元宗即拜爲勃利州刺史
（舊唐書北狄傳）開元十三年安東都護薛泰請於黑水靺鞨內置黑水軍後
更以最大部落爲黑水府以其首領爲都督諸部刺史隸屬焉中國置長史
就其部落監領之十六年其都督賜姓李氏名獻誠授雲麾將軍兼黑水經
略使仍以幽州都督爲其押使

（新唐書北狄傳）黑水東北又有思慕部益北行十日得郡利部東北行十日
得窟說部亦號屈說稍東南行十日得莫曳部又有拂涅虞婁越喜鐵利等
部其地南距渤海北東際於海西接室韋南北袤二千里東西千里拂涅鐵
利虞婁越喜時時通中國而郡利窟說莫曳皆不能自通

按靺鞨七部魏隋兩代疆域無殊其奔散微弱咸在初唐之世於是黑水
勁強恒爲鄰境之患意其斥大土宇非復前規觀其初境僅在安居骨部
西北一隅後乃南與渤海德里府接是其自西而東之明驗也唐書室韋

轉云室建河東合那河忽漢河又東貫黑水靺鞨有南北部寰宇記云黑水部全盛分爲十六部以南北爲綱地考建河卽黑龍江其與松花江合流之處在今富克錦（富錦縣）東北之黑河口那河卽嫩江忽漢河卽牡丹江唐書所云係指兩河下流之水而言第兩河旣入松花江卽不得復施故號是唐史之疏也然唐以前所謂粟末水者僅自長白山至今伯都而止以下則隨其所受而名之故其言如此謂前史誤以松花江爲黑龍江者非也要之名稱雖異疆里可稽據古驗今不難辨方定位耳史又稱室建水東貫黑水靺鞨故靺鞨跨水有南北部以地望診之南部在混同江南烏蘇里江左右之地爲寧古塔東境北部在江北費雅喀奇勒爾之地爲三姓東北境新唐謂北東際海則東至東海濱北至索倫河皆黑水部落矣勃州未詳在通典云貞觀二十年李靖破高麗於南蘇班師至頗利城渡白狼蒼岳二水在奉天新民屯（新民縣）境去黑水絕遠當非其

處又查富克錦東北境外有伯利地方音譯方隅皆合或當是也黑水州黑水府名雖遙設義等羈縻自統全疆初無專治若黑水西北有思慕部益北行得郡利部皆應在黑龍江外其東北窟說部字與庫葉同音爲今庫頁島地毫無疑義稍東南行十日得莫曳部應爲今奇雅喀喇人等所居之地其拂涅虞婁越喜鐵利等部以黑水四徵之皆應在吉林東北拂涅已見前虞婁越喜無所考鐵利據契丹國志在臨潢正東北五千餘里西南與靺鞨國接應距庫葉不遠遼史以契丹僞置之名認爲初唐荒遠之國誤矣大抵魏之勿吉隋之靺鞨名稱雖易七部並同至唐初而五部無聞惟粟末黑水獨盛以唐書考之靺鞨七部全境之地粟末併其西南黑水據其東北而黑水南北部之中又自分十六部其名之可知者八皆北部地也是靺鞨與黑水本自兩事唐書所云東至於海西接突厥南接高麗北鄰室韋是靺鞨之四至元魏隋唐之所同也新書所云南距渤海

北東際於海西抵室韋是黑水靺鞨之四至七部散微之後黑水之所獨也富錦地方爲當時黑水部自無疑義

遼時爲生女真五國等部之一

(契丹國志二十六)女真世居混同江之東山其地乃肅愼氏故區也地方數千里戶口萬餘無大君長立首領分主部落地饒山林契丹於長春路置東北統軍司黃龍府置兵馬都部署司咸州置詳衮司分隸之

(又二十二)東北至生女真國西南至熟女真東至新羅國東北不知其極屢爲邊患契丹亦設防備南北二千餘里西南至東京(寧古塔)六百里

(北盟彙編二)女真古肅愼國也本名珠里真番語詆爲女真或以爲黑水靺鞨之種而渤海之別族有七十二部落無大君長極遠而近東海者謂之東海女真多黃髮碧目謂之黃頭女真

(文獻通考四裔考)女真蓋古肅愼也世居混同江之東長白山下鴨綠江之

源南鄰高麗北接室韋西界渤海鐵甸東瀕海後漢謂之挹婁魏謂之勿吉
隋唐謂之靺鞨姓挐氏隋開皇時曾入貢其族分六部有黑水部即生女真
其水掬之則色微黑目爲混同江即松花江下游與黑龍江合流唐貞觀中靺鞨來朝太宗
問其風俗因言及女真之事自是中國始知其名契丹目之曰慮真五代時
始稱女真後遼主宗眞諱更爲女直俗訛爲女質阿保機吞北方三十六
番此其一也阿保機慮其爲患誘遷豪右數千家於遼陽而著籍焉分其勢
使不得與本國相通謂之合蘇館合蘇館者熟女真也又黃頭女真自咸州
東北分界入谷至涑沫江中間所居者以隸咸州兵馬司與其國往來無禁
謂之回靺回靺者非熟女真亦非生女真自涑沫江之北寧江之東地方千
餘里戶十餘萬無大君長亦無國名自推豪俠爲酋渠小者千戶大者數千
戶則云生女真僻處契丹東北隅

按黑水阻山負海風氣樸實其人勇敢善戰得之則興蓋所謂起事之地

也女真來自高麗據爲已有即使遼思預防尙恐不足以制乃舉關河天險棄之若遺豈非謀之不臧以至此乎

(契丹國志二十二)正東北至鐵離國南至阿里眉等國西南至上京(巴林阿魯科爾沁扎魯特等地)五千餘里

(遼金紀事)海東青出於女真東北鐵甸等五國

(陷虜記)距契丹東至於海有鐵甸其族野居皮帳

(遼史地理志二)五國部聖宗時來附命居本土以鎮東北境屬於黃龍府都部署司

(北盟彙編三)五國之東接大海出海東青女真每出甲兵千餘入五國界即東海巢穴取之與五國戰鬪而後得

(文獻通考四裔四)女真外有五國曰鐵勒曰噴訥曰玩突曰怕忽曰咬里沒皆與接境自天聖沒後屬契丹不復入貢

按靺鞨當即渤海之遺蓋自忽汗破後不復成國避處東偏仍其靺鞨舊號由是而女真強矣魏源云三姓城在寧古塔東北五國城在焉即肅慎氏故墟然史云自頭城以東分爲五國則非一地可知且其名亦不一除博和哩五部外又有烏爾古穆延部至伊呼濟又作鐵驪考之遼營衛志屬國表威烏爾古鐵驪自是別部不在五國部內也其地據朔方備乘圖在混同江北烏蘇里江入混同江之西北云

金時屬於呼爾哈路元時屬於開元路

(金史地理志)呼爾哈路國初置萬戶海陵例罷萬戶乃改節度使承安三年置節度副使西至上京六百三十里北至邊界哈喇巴圖千戶一千五百里(又)金之封疆東極濟喇敏烏達噶之境

按呼爾哈路蓋以河得名今瑚爾哈河自寧古塔下至入混同江處凡六百餘里而路之治所定屬三姓以西至上京六百三十里之文核以今由

三姓至阿什河之方向道里數一一相符路之北境極於哈喇巴圖千戶凡一千五百里以地望診之應爲今混同江以北近索倫處清咸豐以前皆屬於三姓無與於黑龍江也史又言金之封疆東極於濟喇敏此即契丹國志之阿里眉國明之乞例迷今爲濟勒彌亦曰彌勒彌分居於三姓東北混同江兩岸昔時亦轄於三姓金之呼爾哈路以東更不設官則東境所極亦應境統於呼爾哈路如今三姓之比特史無明文然其東境極於東海濱則固信而有徵也

(元史地理志)一開元路古肅愼氏之地隋唐曰黑水靺鞨唐以其地爲燕州置黑水府東瀕海南界高麗西北與契丹接壤即金鼻祖之部落也太祖阿古達旣滅遼即上京設都海陵遷都於燕改爲會寧府金末其將布希萬努據遼東元初癸巳歲出師伐之生擒萬努師至開元(阿什河)率賓(琿春)東土悉平開元之名始見於此乙未歲立開元南京二萬戶治黃龍府至四

年更遼東路總管府二十三年改爲開元路領咸平府後割咸平爲散府俱隸遼東道宣慰司

（元一統志）開元路南鎮長白之山北浸鯨州之海三京故國五國故城亦東北之一都會也

按續通志曰元史志開元路即金會寧府又云開元萬戶治黃龍府考遼黃龍府金改爲隆州非會寧也開元西北曰會寧府西曰黃龍府是會寧黃龍與開元相近非卽開元也又滿洲源流考曰開元本金上京境內地元兵至此遂定其地而故上京一帶俱已殘毀因改建開元路非開元即上京也其初寄治於黃龍府後徙於今開原驛（開原縣）地明初因以設衛亦非今開原即黃龍府也又按元史地志所言蓋全有吉林之地據元一統志三京五國云云則由長白山至黑龍江凡東北濱海之地皆隸於開元自元初立開元萬戶治黃龍府又移治於今農安城（農安縣）已非

金上京之舊至元四年改遼東路總管二十三年改開元路治咸平府再徙於今開原地又非元初治黃龍府之舊明初因其地設開原衛始改元爲原所轄之地視元初時廣狹迥殊考古者每以今之開原爲元之開元則失之遠矣溯開元之東境際於海富錦三姓等處當猶在腹地也

明初爲努兒千都司地

(明一統志八十九)女直東瀕海西接烏良哈南鄰朝鮮北至努兒千北海自混同江至京師三千五百里至南京四千六百里自開原迤北因其部族建置都司一衛一百八十四所二十官其酋長爲都督都指揮千百戶鎮撫等職給與印信俾仍舊俗各統其屬以時來朝

(明實錄)永樂二年置努兒千都司七年改爲都司

(柳邊紀略)甯古塔努兒千都司地又在東北者曰女直

原註女直種三海西者爲海西女直建州毛憐

耨爲建州女直極東者爲野人女直

置都司一曰努兒千置衛三百八十一所二十四

按努兒千之地始見於元元史地理志云海東青由海外飛來至努兒千陶宗儀輟耕錄云高麗以北名別夫八里譯言連五城也罪人之流努兒千者必經此其地極寒海自八月即冰明年四五月方解元史譯文証補云回語五爲別夫城爲八里輟耕錄之說不謬據此則高麗以北爲別夫八里又北始爲努兒千據明宣德八年敕建永寧寺記則努兒千之地實在混同江海口居三姓之東北而三姓地寒多冰相傳爲金五國城舊地與輟耕錄所言別夫八里風土名號八略相符而柳邊紀略謂寧古塔爲努兒千都司地者蓋寧古塔是其治所努兒千則其總稱亦猶清乾隆二十二年以前將軍駐防吉林猶稱寧古塔將軍之比耳旣不得以吉林爲寧古塔則亦不得以寧古塔爲努兒千矣

摘錄三姓管境各衛

屯河衛

永樂三年置 按河在三姓東北即元之桃溫萬戶府也

穆勒肯山衛

永樂四年烏拉等處部人和索哩成格等來朝置衛於鬼里之地 按穆勒肯河出自穆勒肯山會鬼里河入烏蘇里江

喜塔爾河衛

永樂六年置 按河在三姓東北

克默爾河衛

永樂六年置 按河在三姓東北

奇集河衛

永樂六年置 按即奇集河也在三姓東北

綽拉題山衛

永樂六年置 按三姓東北有綽拉題屯

猷特哩衛

永樂六年置 按三姓東北有猷特哩屯

福題希衛

永樂七年置以部人達實爲指揮 按富錦舊名福題新後名福廷城西現有福廷崗即其舊址 再西有古城

奇穆尼衛

永樂七年置以瑚爾穆尼人薩敦爲指揮 按奇穆尼河即奇特尼河在混同江北爲今奇特爾人所居屬俄國境

希禪衛

永樂八年置以部人遷塔努爲指揮僉事 按烏蘇里江東有希禪屯

額勒河衛

永樂八年置 按烏蘇里江東有額勒河爲奇雅喀爾人所居地現爲俄境

弼勒古河衛

永樂八年置舊名卜魯烏 按烏蘇里江東有布魯烏河

實爾固辰衛

永樂十二年置以部人萬達爲指揮 按烏蘇哩江旁有實爾固辰屯在興凱湖東北

和囉噶衛

永樂十三年置

按即元時和囉噶路地也

在三姓境內

和爾邁衛

正統後置

按瑚爾穆山與伊爾穆噶珊相近

和屯衛

正統後置

按瑚爾哈河入混同江之地有和屯噶珊衛當在此

第拉衛

正統後置

按即噶噶珊也與穆呼噶噶珊相近

敦敦河衛

正統後置

按烏蘇哩江東有敦敦窩集

幹資城衛

嘉靖時置

按混同江南有摩利囉噶珊與此城相近

阿奇衛

嘉靖時置

按阿奇噶珊在尼滿噶珊之北與穆克圖里山賓固爾辰噶珊相近

蒐里衛

嘉靖時置

按河在烏蘇里江口

格根衛

嘉靖時置

按蒐里河在烏蘇江口

穆蘇衛

嘉靖時置

按敦敦窩集相近有穆蘇噶珊即衛地

海楚衛

嘉靖時置

按烏蘇里江東與伊爾噶珊相近有海楚噶珊即是地

按明時所設衛所在奉天黑龍江境內者十之二無可考者十之三在吉

林境內者十之七而一地數名重複充數者又居七之一明中葉疆域極於開原而宣德用兵乃及努兒千之地則威棱之遠亦且萬里然考自永樂七年始置努兒千都司至宣德八年纔二十載而用兵至再蓋始也因其部人來朝授以爵秩本未能疆理其地臣服其人特因其荒忽無常之形等諸羈來勿絕之義其後不能及遠縻者益稀而猶多建空名虛飾望聽以故正嘉而後重複滋多其名雖存其實則喪之久矣當明盛之時其域外經營疏略若此清復尤而效之致海濱之地爲他人攘奪可慨矣夫明季及清初隸於東海三部之窩集部後爲赫哲部

(清開國方略)戊申年

明萬曆三十六年

九月窩集部之呼爾哈路侵我寧古塔城我駐

防薩齊庫兵擊敗之有逃至窩集部之瑚葉路者己酉年大臣扈爾漢率兵取瑚葉路

(又)先是東海呼爾哈路扎庫塔人來降既又貪烏拉國布匹其貝勒辛亥年

明萬曆三十九年 冬十一月大臣額亦都等率兵克之

(又)天聰三年十一月那堪泰路之呼爾哈人來歸命於寧古塔邊地駐牧分爲十屯

喀爾喀穆屯

遮克特庫屯

塔圖庫屯

福提希屯

鄂爾琿屯

幹齊奇屯

庫巴察拉屯

額提齊屯

薩里屯

尼葉爾伯屯

(又)崇德七年沙爾虎達等率兵征松阿里江之呼爾哈人十屯俱降之
(滿洲源流考)自寧古塔東行千餘里住烏拉哩江兩岸者曰穆倫又東二百里住尼滿河源者曰奇雅喀喇一曰恰喀喇

(又)寧古塔以東有赫哲部奇雅喀部費雅喀部奇勒爾部庫頁部又有使犬赫哲亦謂之魚皮部

按東海三部分爲瓦爾喀部窩集部呼爾哈部瓦爾喀部則爲圖們江北

岸今延琿等處窩集部則爲烏蘇里江松花江混同江及東海濱等處呼爾哈部爲迤西及北夫餘等處窩集部又分爲各路

赫席赫路

鄂謨和蘇魯路（今額穆縣舊名額默和索羅站）

佛納赫托克索路（今佛多河在額穆縣北）

瑚葉路（今虎林縣舊名虎林河古名瑚葉河）

綏芬路（今綏芬河即中東火車五站）

那穆都魯路

寧古塔路（今寧安縣舊名寧五台）

尼馬察路（今烏蘇里江東兒滿河）

烏固爾辰路（今東海濱胡爾新河）

穆稜路（今穆稜縣舊名穆稜河）

雅蘭路（今東海濱雅蘭河）

錫林路（今東海濱錫林河）

奇雅喀喇路（烏蘇里江東奇雅爾人所居地）

音達琿路（樺川縣音達木河）

塔庫喇喇路

錫拉忻路（今東海濱錫拉巴錫河）

按窩集部各路東至東海濱南部北至混同江松花江南岸三姓迤東西至額穆縣一帶疆域可謂廣大後均歸服滿洲窩集之名於焉消滅然際海際江各邊地猶復自爲部落臣服朝貢而已大穆稜河佐近所居之人曰穆倫烏蘇里江東泥滿河佐近所居之人曰奇雅爾今其種族皆在費雅喀部在混同江兩岸卽今費雅爾人所居地奇勒爾部在混同江北岸近黑河處卽今奇特爾人所居地赫哲部據柳邊紀略云俗呼爲黑斤有

雉髮不雉髮之兩種其地自寧古塔東北行千五百里住松花江烏蘇里江兩岸者皆赫哲喀喇又東行四五百里住烏蘇里江松花江黑龍江（黑龍江北端通松花處名曰黑河）三水匯流左右者亦曰赫哲喀喇即使犬國也以史地考之當爲今奇特爾人俗呼爲魚皮達子即魚皮部也其餘依蘭樺川富錦同江饒河虎林均爲赫哲故地庫頁部即今庫頁島職貢圖云庫野居東海島之雅丹達里堪每歲進貂皮以其居甚遠不能至寧古塔每年六月遣官至離寧古塔三千里之普祿鄉收貢頒賜焉

清定鼎後隸於三姓末季設縣治

（文獻通考）康熙五十四年在依蘭哈達建三姓城置駐防旗兵設協領等官管領雍正十年增設副都統

（吉林通志）富克錦原名富替新屬於三姓副都統管轄光緒八年設駐防協領挑赫哲兵四百名管領之

(協署檔案)光緒十六年開放官荒沿江五里以內劃歸赫哲生計地三十一年在黑河口(今同江縣)設臨江州管理民事宣統二年裁撤協領遣散赫哲旗兵

(縣署檔案)光緒三十四年在富克錦設分防巡檢隸於臨江州宣統二年改設富錦縣

按吉林外紀三姓地方乃努雅喇克宜克勒祐什哈哩三姓赫哲所居之地也先設協領一人佐領防禦驍騎校各設四人以捕貂之新滿洲(即赫哲)二百名挑充額兵又撥吉林旗兵八十名雍正五年增設副協領一人又將八姓赫哲打牲人等挑甲兵一千名十年復添設副都統一人並增佐領驍騎校各十六人防禦十二人領催九十五人先鋒三十七人甲兵共歸成一千三百六十五人改正副協領爲左右兩翼協領其管境自康熙二十八年與俄羅斯定約分界混同江松花江烏蘇里江各流域

及東海濱等處均爲清國領土歸三姓副都統管轄至咸豐十一年復爲俄人割據又定約以蜂蜜山黑河口額圖街基拉哈蘇蘇爲界殊爲千載憾事又訪詢地方耆老富克錦即富替新轉音俗呼爲付廷吉林將軍銘安因赫哲兵調赴甘肅有戰功奏設富克錦協領並佐領驍騎校各四人防禦二人領催十二人挑補赫哲甲兵四百名沿烏蘇里江松花江之間均爲其管境即赫哲部落之地也光緒十六年開放通江付廷等處官荒人烟日多漢民漸聚三十一年在黑河口設臨江州三十四年設富克錦分防巡檢宣統二年改設富錦縣知縣是年並裁撤協領等官遣散赫兵爲民

民國成立以來仍延縣治庶政不興

(縣署檔案)民國元年設商務會二年設勸學所警察所擴充學校添置警察
九年設農會添保衛團

按富錦枕江帶河土地肥沃交通便利出產豐富將來必成繁富之縣警察初設長警八十名分警區爲六漸次擴充至一百五十名全縣民地按原放之荒八十餘萬垧商民輻湊逐漸發達至民國五年已墾成熟地十萬垧有奇六年賊匪肆起連續蹂躪百姓流離田地荒蕪納賦地漸縮至四萬餘垧在清末時代創設小學校兩處民國三年復設高小學校一處國民學校六處後又增設女子國民學校一處國民學校至十一處有因荒亂暫行停學者數處農產物以豆麥爲大宗雜糧次之保衛團創設額丁二百名商團創設額兵六十名民國十二年五月雲桐到任擴充商團達二百名增加城鄉民團一千八百名力圖自衛地方又安商民又有集聚之象復出放五區集賢鎮六區七星屯鎮兩處街基以興商業至九月雲桐調任賓縣



